



ეროვნული საგანმანათლებლო უნივერსიტეტი

სტუდენტური თვითმმართველობის დებულება

დამტკიცებული:

სენატის სხდომის ოქმი N4.

თარიღი: 13.02.2023 წ.

დადგენილება N7.

ცვლილება:

სენატის სხდომის ოქმი N2.

თარიღი: 28.01.2025 წ.

დადგენილება N39.



მუხლი 1. ზოგადი დებულებები

- 1.1. „ნეუ - ეროვნული საგანმანათლებლო უნივერსიტეტი“ (შემდგომში „უნივერსიტეტი“) სტუდენტური თვითმმართველობა არის „უმაღლესი განათლების შესახებ“ საქართველოს კანონის მოთხოვნათა დაცვით, უნივერსიტეტის სტუდენტების მიერ საყოველთაო, თანასწორი, პირდაპირი და ფარული არჩევნების წესით სკოლებში არჩეული სტუდენტთა წარმომადგენლობითი ორგანო;
- 1.2. სტუდენტური თვითმმართველობის სამართლებრივი სტატუსი განისაზღვრება საქართველოს კანონით „უმაღლესი განათლების შესახებ“ და წინამდებარე დებულებით. სტუდენტური თვითმმართველობის საქმიანობა ხორციელდება ამ დებულების შესაბამისად;
- 1.3. სტუდენტური თვითმმართველობა არის უნივერსიტეტის ფარგლებში მოქმედი დამოუკიდებელი ორგანო;
- 1.4. სტუდენტური თვითმმართველობის საქმიანობა იმართება მისი საბჭოს მიერ;
- 1.5. თუ სტუდენტური თვითმმართველობის მოქმედება ეწინააღმდეგება უნივერსიტეტის შინაგანაწესს, სტუდენტური თვითმმართველობის მუშაობა შეჩერდება დროებითი ვადით, რომლის ხანგრძლივობასაც განსაზღვრავს უნივერსიტეტის რექტორი;
- 1.6. სტუდენტური თვითმმართველობის და მისი ორგანოების არჩევნების წესი და პირობები განსაზღვრულია წინამდებარე დებულებით;
- 1.7. სტუდენტური თვითმმართველობის არჩევნები ტარდება 4 (ოთხი) წელიწადში ერთხელ შემოდგომის სემესტრის დასაწყისში (სწავლის დაწყებიდან არაუგვიანეს 60 (სამოცი) კალენდარული დღის ვადაში);
- 1.8. სტუდენტური თვითმმართველობის მოქმედი საბჭოს უფლებამოსილება სრულდება უნივერსიტეტის ახალი სტუდენტური თვითმმართველობის არჩევის მომენტიდან;
- 1.9. სტუდენტურ საბჭოს არ შეუძლია მონაწილეობა მიიღოს პოლიტიკურ ღონისძიებებში. ის არ არის უფლებამოსილი ჩაიდინოს ქმედება, რომელსაც უარყოფითი გავლენა ექნება უნივერსიტეტის სახელსა და პრესტიჟზე;
- 1.10. სტუდენტურ თვითმმართველობას, უნივერსიტეტის ადმინისტრაციასთან შეთანხმებით, გააჩნია საკუთარი აუდიტორია და ინვენტარი.

მუხლი 2. ტერმინთა განმარტება

- 2.1. დებულებაში გამოყენებული ტერმინების განმარტება:

- ა. სტუდენტი - პირი, რომელიც "უმაღლესი განათლების შესახებ" საქართველოს კანონით განსაზღვრული წესით ჩაირიცხა და სწავლობს უნივერსიტეტის საგანმანათლებლო პროგრამებზე;
- ბ. სტუდენტური თვითმმართველობა - უნივერსიტეტის სტუდენტების წარმომადგენლობითი ორგანო;
- გ. უნივერსიტეტი - „ნეუ - ეროვნული საგანმანათლებლო უნივერსიტეტი“;
- დ. უნივერსიტეტის ადმინისტრაცია - „ნეუ - ეროვნული საგანმანათლებლო უნივერსიტეტის“ ყველა რგოლის მმართველობითი ორგანო, რომელიც ახორციელებს უნივერსიტეტის მართვას, ადმინისტრირებას და სასწავლო პროცესს;
- ე. სკოლა - „ნეუ - ეროვნული საგანმანათლებლო უნივერსიტეტის“ ძირითადი სასწავლო და ადმინისტრაციული ერთეული, რომელიც უზრუნველყოფს სტუდენტთა მომზადებას ერთ ან რამდენიმე სპეციალობაში და მათთვის შესაბამისი აკადემიური ხარისხის მინიჭებას.

მუხლი 3. სტუდენტური თვითმმართველობის მიზნები

3.1. სტუდენტური თვითმმართველობის მიზნებია:

- ა. დაიცვას და წარმოადგინოს სტუდენტების ინტერესები უნივერსიტეტის მართვის ორგანოებთან ურთიერთობაში;
- ბ. ხელი შეუწყოს სტუდენტებს მათი უფლებებისა და თავისუფლებების, მათი კანონიერი ინტერესების დაცვაში, განმტკიცებასა და პრაქტიკულ რეალიზაციაში;
- გ. დაეხმაროს სტუდენტებს მაღალკვალიფიციური განათლების მიღებაში, დახმარება გაუწიოს უნივერსიტეტის ადმინისტრაციას სასწავლო პროცესის დახვეწაში;
- დ. შექმნას ოპტიმალური პირობები სტუდენტთა სოციალურ - კულტურული, სპორტული, დასვენების, ყოფისა და სხვა მოთხოვნილებათა დასაკმაყოფილებლად, გაამრავალფეროვნოს სტუდენტური ცხოვრება;
- ე. ხელი შეუწყოს სხვადასხვა ეროვნების სტუდენტების დაახლოებას. ხელი შეუწყოს მათი კულტურების წარმოჩენას უნივერსიტეტის ფარგლებში;
- ვ. ურთიერთობები დაამყაროს და გააღრმავოს სხვა უმაღლესი საგანმანათლებლო დაწესებულების სტუდენტურ თვითმმართველობებთან და სხვა სტუდენტურ ორგანიზაციებთან;
- ზ. უზრუნველყოს სტუდენტები თვითმმართველობის კომპეტენციის ფარგლებში ყველა საჭირო ინფორმაციით და მნიშვნელოვანი როლი ითამაშოს უნივერსიტეტის ახლად მოსული სტუდენტების ინტეგრაციაში.

მუხლი 4. სტუდენტური თვითმმართველობის უფლებამოსილება

4.1. სტუდენტური თვითმმართველობა თავისი კომპეტენციის ფარგლებში:

ა. ხელს უწყობს სტუდენტთა უფლებების დაცვას;

ბ. სტუდენტური თვითმმართველობის საბჭო წარუდგენს მმართველობით ორგანოს - სენატს 2 (ორი) წევრ სტუდენტს;

გ. სტუდენტური თვითმმართველობის საბჭო წარუდგენს სკოლების საბჭოს 2 (ორი) წევრ სტუდენტს;

დ. თვითმმართველობის საბჭოს წევრები უფლებამოსილნი არიან სკოლის დეკანის/დეკანის მოადგილის მოწვევით დაესწრონ და ისარგებლონ ხმის უფლებით სკოლის საბჭოების სხდომებზე;

ე) თვითმმართველობა წარმოადგენს სტუდენტის ინტერესებს უნივერსიტეტის მართვის ორგანოებთან ურთიერთობაში.

4.2. სტუდენტური თვითმმართველობის ბიუჯეტი:

ა. სტუდენტური თვითმმართველობა უფლებამოსილია უნივერსიტეტის ფინანსური და მატერიალური რესურსების სამსახურს წარუდგინოს თვითმმართველობის ერთი წლის სამოქმედო გეგმა და მოითხოვოს შესაბამისი დაფინანსება;

ბ. უნივერსიტეტის ფინანსური და მატერიალური რესურსების სამსახური უფლებამოსილია გამოყოს სპეციალური ფონდი სტუდენტთა საბჭოსათვის ან შეამციროს ბიუჯეტი უნივერსიტეტის ფინანსური მდგომარეობის შესაბამისად.

4.3. სტუდენტური თვითმმართველობა უფლებამოსილია, მითითებული მიზნების განსახორციელებლად მოაწყოს შესაბამისი შეხვედრები, დებატები, დისკუსიები, ტრენინგები, ინტელექტუალური თამაშები, საგანმანათლებლო, ლიტერატურული, სპორტული, კულტურული, გასართობი/სამეცნიერო და კანონით ნებადართული სხვა სახის ღონისძიებები. სტუდენტური თვითმმართველობა უფლებამოსილია განახორციელოს საქველმოქმედო საქმიანობა;

4.4. სტუდენტური თვითმმართველობა უფლებამოსილია ითანამშრომლოს სხვა საუნივერსიტეტო, სამთავრობო და არასამთავრობო ორგანიზაციებთან, აგრეთვე აპოლიტიკურ გაერთიანებებთან, სახელმწიფო და საერთაშორისო ორგანიზაციებთან.

მუხლი 5. სტუდენტური თვითმმართველობის წევრობა

5.1. სტუდენტური თვითმმართველობის წევრია ის სტუდენტი, რომელიც ამავე დებულებით დადგენილი წესით (მუხლი 12.) არჩეული იქნება სტუდენტურ თვითმმართველობაში;

5.2. სტუდენტური თვითმმართველობის წევრის უფლებამოსილების ვადა განისაზღვრება 4 (ოთხი) სასწავლო წლით;

5.3. სტუდენტური თვითმმართველობის წევრის უფლებამოსილება იწყება მისი არჩევის მომენტიდან და წყდება:

ა. პირადი განცხადების საფუძველზე;

ბ. უნივერსიტეტში ადმინისტრაციულ თანამდებობაზე დანიშვნის შემთხვევაში;

გ. სტუდენტის სტატუსის შეჩერების და/ან შეწყვეტის შემთხვევაში;

დ. თუ სტუდენტმა მიიღო დისციპლინური სასჯელი უნივერსიტეტის შინაგანაწესის, მისიისა და "უმაღლესი განათლების შესახებ" საქართველოს კანონის დარღვევის გამო, ასევე საქართველოს კანონმდებლობით გათვალისწინებულ სხვა შემთხვევებში;

ე. თვითმმართველობის საბჭოს გადაწყვეტილებით, თუ იგი აღარ არის ქმედითუნარიანი და არ ცხადდება შეხვედრებზე საპატიო მიზნების გარეშე.

5.4. სტუდენტურ თვითმმართველობას შეიძლება ჰყავდეს საპატიო წევრი, რომელიც არ არის უნივერსიტეტის სტუდენტი და რომელზედაც არ ვრცელდება ამ დებულებით გათვალისწინებული ნორმები. საპატიო წევრი არ სარგებლობს ხმის უფლებით;

5.5. სტუდენტური თვითმმართველობის წევრის უფლებამოსილების ვადაზე ადრე შეწყვეტის შემთხვევაში თვითმმართველობის ახალი წევრი ხდება ის პირი, რომელმაც ბოლო არჩევნებში დააგროვა ხმათა უმრავლესობა, მაგრამ თვითმმართველობის წევრად არჩევისათვის არასაკმარისი რაოდენობა. თანაბარი ხმების მქონე პირთაგან თვითმმართველობის წევრი შეირჩევა თვითმმართველობის მიერ ჩატარებული კენჭისყრით. ახლად არჩეული თვითმმართველობის წევრი უფლებამოსილებას ახორციელებს გამოკლებული წევრის უფლებამოსილების დარჩენილი პერიოდის განმავლობაში. სტუდენტური თვითმმართველობის წევრობის კანდიდატები არ მონაწილეობენ არჩევნებში.

მუხლი 6. თვითმმართველობის წევრის უფლებები და მოვალეობები

6.1. სტუდენტური თვითმმართველობის წევრი უფლებამოსილია:

ა. მონაწილეობა მიიღოს თვითმმართველობის მართვის ორგანოების მუშაობაში;

ბ. იქონიოს სათათბირო ხმის უფლება თვითმმართველობის შეხვედრებზე;

გ. შინაგანაწესით განსაზღვრული მიზნების განსახორციელებლად წინადადებებით მიმართოს თვითმმართველობის მართვის ორგანოებს;

დ. აირჩიოს და იყოს არჩეული სტუდენტური თვითმმართველობის მართვის ორგანოებში;

ე. მიიღოს მონაწილეობა სტუდენტური თვითმმართველობის მიერ ორგანიზებულ ღონისძიებებში ან თავად შეიმუშაოს და განახორციელოს ისინი;

ვ. მიიღოს ყოველგვარი ინფორმაცია სტუდენტური თვითმმართველობის წევრებისაგან მათი საქმიანობის შესახებ.

6.2. სტუდენტური თვითმმართველობის წევრი ვალდებულია:

ა. შეასრულოს სტუდენტური თვითმმართველობის დებულებით მასზე დაკისრებული მოვალეობები;

ბ. დაიცვას სტუდენტური თვითმმართველობის სახელი, ავტორიტეტი და ქონება;

გ. უნივერსიტეტის ქონების დაზიანების შემთხვევაში სტუდენტური თვითმმართველობის საბჭო ვალდებულია გამოიკვლიოს ქონების დაზიანების ფაქტი და დაზიანებაში მონაწილე პირის/პირების შესახებ ინფორმაცია წარუდგინოს უნივერსიტეტის ადმინისტრაციას, წინააღმდეგ შემთხვევაში თავად აანაზღაურებს უნივერსიტეტისათვის მიყენებულ ზიანს;

დ. ხელი შეუწყოს სტუდენტებსა და უნივერსიტეტის მართვის ორგანოებს შორის ჯანსაღი ურთიერთობების ჩამოყალიბებას.

მუხლი 7. სტუდენტური თვითმმართველობის მართვის ორგანოები

7.1. სტუდენტური თვითმმართველობის მართვის ორგანოებია:

ა. სტუდენტური თვითმმართველობის წევრთა საერთო კრება;

ბ. სტუდენტური თვითმმართველობის პრეზიდენტი;

გ. სტუდენტური თვითმმართველობის საბჭო;

დ. სტუდენტური თვითმმართველობის აღმასრულებელი განყოფილებები.

მუხლი 8. თვითმმართველობის წევრთა საერთო კრება

8.1. თვითმმართველობის წევრთა საერთო კრება წარმოადგენს სტუდენტური თვითმმართველობის უმაღლეს წარმომადგენლობით ორგანოს, რომელიც შედგება სტუდენტურ თვითმმართველობაში არჩეული ყველა წევრისაგან.

8.2. თვითმმართველობის წევრთა საერთო კრება უფლებამოსილია, თუ მას ესწრება წევრთა სიითი შემადგენლობის 70%.

8.3. თვითმმართველობის წევრთა საერთო კრება უფლებამოსილია:

ა. სრული შემადგენლობის უმრავლესობით აირჩიოს თვითმმართველობის პრეზიდენტი და განყოფილებების თავმჯდომარეები დამსწრეთა ხმების უმრავლესობით;

ბ. დაკავებული თანამდებობიდან გაათავისუფლოს თვითმმართველობის პრეზიდენტი, ხმის მიცემაში მონაწილეთა ხმების 70%-ით;

გ. თვითმმართველობის წევრთა საერთო კრების რიგგარეშე მოწვევის უფლება აქვს სტუდენტური თვითმმართველობის პრეზიდენტს, თვითმმართველობის საბჭოს წევრთა სიითი შემადგენლობის 70%-ს ან თვითმმართველობის წევრთა 25%-ს.

მუხლი 9. სტუდენტური თვითმმართველობის პრეზიდენტი

9.1. სტუდენტური თვითმმართველობის პრეზიდენტად შეიძლება არჩეულ იქნას თვითმმართველობის ნებისმიერი წევრი, თვითმმართველობის პრეზიდენტად ერთი და იგივე სტუდენტი შეიძლება აირჩიონ მხოლოდ ერთხელ;

9.2. თვითმმართველობის პრეზიდენტი აირჩევა სტუდენტური თვითმმართველობის დელეგატების მიერ 4 (ოთხი) წლის ვადით, ფარული კენჭისყრით, სტუდენტურ თვითმმართველობაში არჩეული წევრების სიითი შემადგენლობის ნახევარზე მეტით;

9.3. სტუდენტური თვითმმართველობის პრეზიდენტობის კანდიდატის დასახელების უფლება აქვს თვითმმართველობის წევრთა სრული შემადგენლობის 1/5-ს;

9.4. იმ შემთხვევაში, თუ ვერც ერთმა კანდიდატმა ვერ მოაგროვა ხმათა საკმარისი რაოდენობა, ინიშნება მეორე ტური იმ პირველი ორი კანდიდატისთვის, რომელმაც დააგროვა ხმათა ყველაზე მეტი რაოდენობა. იმ შემთხვევაში, თუ მეორე ტურშიც ვერც ერთმა კანდიდატმა ვერ დააგროვა საკმარისი ხმათა რაოდენობა, 5 (ხუთი) დღის ვადაში ინიშნება ხელახალი არჩევნები.

9.5. სტუდენტური თვითმმართველობის პრეზიდენტი:

ა. ხელმძღვანელობს თვითმმართველობის საბჭოს სხდომებს;

ბ. კოორდინაციას უწევს სტუდენტური თვითმმართველობის ორგანოთა მუშაობას;

გ. იწვევს სტუდენტური თვითმმართველობის საბჭოს სხდომებს;

დ. სტუდენტური თვითმმართველობის წევრთა საერთო კრებას დასამტკიცებლად წარუდგენს აღმასრულებელი განყოფილებების თავმჯდომარეების კანდიდატურებს;

ე. წარმოადგენს სტუდენტურ თვითმმართველობას ორგანიზაციებთან, უწყებებთან, მესამე პირებთან ურთიერთობის დროს;

ვ. იწვევს თვითმმართველობის წევრთა საერთო კრებას.

მუხლი 10. სტუდენტური თვითმმართველობის საბჭო

10.1. სტუდენტური თვითმმართველობის წარმომადგენლობითი ორგანოა სტუდენტური თვითმმართველობის საბჭო, რომელიც შედგება სტუდენტური თვითმმართველობის პრეზიდენტისა და სტუდენტური თვითმმართველობის განყოფილებების ხელმძღვანელებისაგან;

10.2. საბჭო განსაზღვრავს წლის განმავლობაში სტუდენტური თვითმმართველობის ძირითად პრიორიტეტებსა და ამოცანებს. იგი განსაზღვრავს აღმასრულებელი განყოფილებების საქმიანობის ძირითად პრინციპებსა და მიმართულებებს;

10.3. საბჭო იკრიბება სასწავლო წლის განმავლობაში საჭიროების შესაბამისად;

10.4. საბჭოს სხდომა უფლებამოსილია, თუ მას ესწრება წევრთა სიითი შემადგენლობის უმრავლესობა; გადაწყვეტილება მიიღება დამსწრეთა ხმების უმრავლესობით; ხმების გაყოფის შემთხვევაში პრეზიდენტს ეძლევა 2 (ორი) ხმის უფლება; რიგგარეშე სხდომის მოწვევა შეუძლია სტუდენტური თვითმმართველობის პრეზიდენტს ან საბჭოს წევრთა 70%-ის წერილობითი მოთხოვნის საფუძველზე;

10.5. სტუდენტური თვითმმართველობის საბჭო უფლებამოსილია:

ა. განსაზღვროს წლის პრიორიტეტები;

ბ. საჭიროების შემთხვევაში შეიმუშაოს წლიური სამოქმედო გეგმა;

მუხლი 11. სტუდენტური თვითმმართველობის აღმასრულებელი განყოფილებები.

11.1. თვითმმართველობის მიზნების შესასრულებლად შესაძლებელია შეიქმნას შემდეგი განყოფილებები:

საშინაო საქმეების განყოფილება: იცავს სტუდენტების უფლებებს, ინტერესებსა და თავისუფლებებს, ეხმარება სტუდენტებს სასწავლებლის შიგნით არსებული პრობლემების მოგვარებაში, არის დამაკავშირებელი რგოლი სტუდენტებსა და ადმინისტრაციას შორის;

განათლებისა და მეცნიერების განყოფილება: ხელს უწყობს სწავლის ხარისხის ამაღლებასა და არაფორმალური განათლების გავრცელებას უნივერსიტეტში;

კულტურისა და დასვენების განყოფილება: ორგანიზებას უკეთებს კულტურულ და გასართობ ღონისძიებებს, აწყობს ლაშქრობებს, კემპინგებს, ისტორიულ ტურებს, ჯომარდობას და სხვა სტუდენტურ აქტივობებს. ეხმარება სხვა განყოფილებებს დაგეგმილი ღონისძიებების ორგანიზებაში;

საგარეო ურთიერთობის განყოფილება: აქვს სისტემატური ურთიერთობა სხვა უმაღლესი საგანმანათლებლო

დანესებულებების სტუდენტურ თვითმმართველობებთან და სხვა სტუდენტურ, სამთავრობო და არასამთავრობო ორგანიზაციებთან;

სპორტის განყოფილება: ორგანიზებას უკეთებს სხვადასხვა სახეობის სპორტულ ღონისძიებებსა და ტურნირებს.

მუხლი 12. თვითმმართველობის არჩევნები

12.1. სტუდენტური თვითმმართველობის არჩევნები ტარდება 4 (ოთხი) წელიწადში ერთხელ სასწავლო წლის საშემოდგომო სემესტრის დაწყებიდან არა უგვიანეს 60 (სამოცი) კალენდარული დღის ვადაში;

12.2. სტუდენტი, რომელსაც მიღებული აქვს დისციპლინური სასჯელი, ვერ გახდება სტუდენტური თვითმმართველობის საბჭოს წევრი. სტუდენტური თვითმმართველობის საბჭოს წევრი ავტომატურად კარგავს ამ სტატუსს, თუ იგი მისი წევრობის პერიოდში მიიღებს დისციპლინურ სასჯელს;

12.3. სტუდენტური თვითმმართველობის არჩევნებში მონაწილეობის უფლება აქვს უნივერსიტეტის ყველა სტუდენტს, თუ იგი აკმაყოფილებს წინამდებარე დებულებით დადგენილ მოთხოვნებს;

12.4. არჩევნები ჩატარებულად ჩაითვლება, თუ არჩევნებში მონაწილეობას მიიღებს არანაკლებ სტუდენტების რაოდენობის ნახევარი;

12.5. საარჩევნო სისტემა ყველა კურსის სტუდენტებისათვის:

ა. არჩევნების ორგანიზებისათვის უნივერსიტეტი იყოფა საარჩევნო "უბნებად" სკოლების მიხედვით. სკოლების სტუდენტები ირჩევენ 1 (ერთი) სტუდენტს, როგორც თავმჯდომარეს, 1 (ერთი) სტუდენტს, რომელიც წარმოადგენს სკოლას სკოლის საბჭოში და კურსიდან (ჯგუფიდან) ორ - ორ წარმომადგენელს თვითმმართველობაში. 1 (ერთი) სტუდენტს არ შეიძლება ჰქონდეს საბჭოში ერთ ფუნქციაზე მეტი. თუ სტუდენტი არჩეულ იქნა ერთზე მეტ პოზიციაზე, ის ინარჩუნებს მხოლოდ ზემდგომ პოზიციას. მის შესაცვლელად მეორე პოზიციაზე აირჩევა მომდევნო სტუდენტი, რომელმაც ყველაზე მეტი ხმა მიიღო;

ბ. სტუდენტურ თვითმმართველობაში არჩევის მიზნით თითოეული კურსი (ჯგუფი) არჩევნებამდე ერთი კვირით ადრე წარმოადგენს არაუმეტეს 3 (სამი) კანდიდატს;

გ. თითოეული კანდიდატის უფლებამოსილება დადასტურებული უნდა იყოს 10 (ათი) სტუდენტის მხარდაჭერით.

მუხლი 13. სამანდატო და ხმის დამთვლელი კომისიების არჩევის წესი

13.1. სამანდატო და ხმის დამთვლელი კომისიების არჩევა ხდება არჩევნების წინა დღეს სტუდენტთა

თვითმმართველობის საერთო კრებაზე. წევრთა შერჩევისას გათვალისწინებული უნდა იქნას სკოლებისა და კურსების სტუდენტთა თანაბრობის პრინციპი;

13.2. სამანდატო კომისია შედგება 3 - 5 წევრისაგან, რომლებიც ვალდებული არიან არჩევნების დღეს სკოლის დეკანის/შოადგილის მიერ მიწოდებული სტუდენტთა სიების გათვალისწინებით რეგისტრაციაში გაატაროს არჩევნებში გამოცხადებული სტუდენტები, ხელი მოაწერინონ სახელისა და გვარის გასწვრივ, გადასცენ საარჩევნო ბიულეტენები (ასარჩევ კანდიდატთა სია), რეგისტრაციის დასრულების შემდეგ შეადგინონ ოქმი გამოცხადებული სტუდენტების ჯამისა და საარჩევნო ბიულეტენის შესახებ, ოქმი ყველა წევრის ხელმოწერით გადაეცემა ხმის დამთვლელ კომისიას;

13.3. ხმის დამთვლელი კომისია შედგება 3 - 5 წევრისაგან, რომლებიც ვალდებული არიან მოაწესრიგონ საარჩევნო ყუთები, უფლება მისცეს არჩევნებზე გამოცხადებულ სტუდენტებს ჯანსაღ გარემოში თავისუფლად და შეუფერხებლად გადაადგილდნენ, ასევე შემოხაზონ სასურველი კანდიდატი და საარჩევნო ბიულეტენები სისტემურად და ორგანიზებულად ჩაყარონ საარჩევნო ყუთში. არჩევნების დღის ბოლოს დათვალონ ბიულეტენები, გამოავლინონ გამარჯვებული კანდიდატები, შეადგინონ შესაბამისი ოქმი და გამარჯვებულ კანდიდატთა სია დასამტკიცებლად გადასცენ უნივერსიტეტის რექტორს.

მუხლი 14. დასკვნითი დებულებები

14.1. წინამდებარე დებულებას ამტკიცებს უნივერსიტეტის სენატი;

14.2. უნივერსიტეტის წინამდებარე დებულება მოქმედებს ხელმოწერისთანავე;

14.3. დებულების მიღება, გაუქმება, ცვლილებებისა და დამატებების შეტანა ხორციელდება სენატის მიერ;

14.4. წინამდებარე დებულება ძალას კარგავს ახალი დებულების დამტკიცების შემთხვევაში.